

PROGRAM JALINAN INTEGRASI NASIONAL MAHASISWA TAHUN 2023

Bismillahirrahmanirrahim

Assalamualaikum warahmatullahi wabarakatuh

Selamat Sejahtera

Salam Perpaduan

Salam Malaysia MADANI

PENDAHULUAN

1. Sebagai pembuka bicara, izinkan saya menzahirkan rasa penuh kesyukuran ke hadrat illahi kerana dengan keizinan-Nya dapat kita bersama-sama berhimpun pada hari ini bagi menjayakan **Program Jalinan Integrasi Nasional Mahasiswa Di Sarawak Tahun 2023**.

MAHASISWA SEBAGAI AGEN PERPADUAN NEGARA

Hadirin dan hadirat yang saya hormati sekalian,

2. Kerajaan melalui Jabatan Perpaduan Negara dan Integrasi Nasionan (JPNIN) **sentiasa beriltizam dan komited memastikan inisiatif kerajaan dalam menerajui agenda perpaduan** untuk melahirkan bangsa Malaysia yang patriotik, demokratik dan berkeperibadian tinggi.
3. Penganjuran program ini adalah bagi memberi tumpuan untuk **menggalakkan interaksi pelbagai hala, pengukuhan pemahaman dan kerjasama antara mahasiswa bersama komuniti rumah panjang** yang terdiri daripada pelbagai latar belakang etnik, budaya, dan agama. Dengan mempertimbangkan kepelbagaian yang ada, program ini **menciptakan persekitaran yang inklusif dan menyediakan platform bagi para mahasiswa untuk saling mempelajari dan menghargai keunikan kelompok masing-masing**.
4. Saya difahamkan **seramai 65 orang mahasiswa Semenanjung yang menuntut di Universiti Putra Malaysia (UPM) Kampus Bintulu dan Institut Pendidikan Guru (IPG) Kampus Rajang telah berkampung selama lima (5) hari dan empat (4) malam di Rumah Panjang Nanga Tada**.

5. Mahasiswa sebagai orang muda **sewajarnya terkehadapan dalam mempromosikan ruang interaksi harmoni dan positif di kala persekitaran yang semakin mencabar dan kompetitif**. Anak muda merupakan tenaga utama negara amat signifikan yang mampu mempengaruhi masa depan negara kerana golongan ini paling bertenaga dan produktif sekali.
6. Rentetan itu, dengan pelbagai aktiviti yang telah dilaksanakan sepanjang program ni berlangsung, mahasiswa berpeluang untuk berinteraksi, bertukar pengalaman, dan memahami perspektif masing-masing. Tuntasnya, setiap inisiatif yang digabungkan berupaya mengurangi jurang persepsi dan memupuk perpaduan dalam kepelbagaian.
7. Justeru, kementerian dan jabatan **mengalu-alukan idea, pandangan dan penglibatan mahasiswa sebagai jurubicara perpaduan dalam membantu dan bersama-sama kerajaan untuk membangunkan negara dan bangsa yang makmur dan bersatu**.

JARINGAN STRATEGIK JPNIN DAN PEMEGANG TARUH

Anak-anak mahasiswa dan para hadirin yang dihormati,

8. Jika tidak dipecahkan ruyung, manakan dapat sagunya. Saya yakin jaringan strategik di antara JPNIN dan pemegang taruh seperti Komuniti Rumah Panjang, Yayasan Sukarelawan Siswa (YSS), Institut Pengajian Tinggi Awam dan Jabatan Arkib Negara Negeri Sarawak mampu memperhebatkan semangat perpaduan yang kita idamkan bersama.
9. Program hari ini merupakan terjemahan kolaborasi aktif kita dan pelbagai pihak berkepentingan yang disusun rapat telah **mendedahkan mahasiswa untuk beradaptasi dengan lingkungan yang berbeza. Impaknya, anak muda boleh mengembangkan keterampilan sosial, penyesuaian diri, dan rasa empati yang kuat**. Hasilnya, berlaku hubungan dan interaksi sosial antara generasi muda dan komuniti setempat.
10. Suka saya simpulkan di sini, interaksi dalam kalangan mahasiswa dan komuniti setempat **berjaya mengurangi *stereotype* dan prasangka malah menyerlahkan sikap toleransi dan saling menghargai kepelbagaian dan keunikan. Setiap dari kalangan kita berperanan untuk menyumbang ke arah mempertahankan keharmonian dan keamanan yang dikecapi. *No one is too small to make a difference!***

PENUTUP

Para hadirin yang dikasihi sekalian,

11. Akhir kalam, saya ingin merakamkan setinggi-tinggi penghargaan dan ucapan terima kasih kepada pihak tuan rumah panjang, institut pengajian tinggi awam (IPTA) dan agensi-agensi kerajaan yang komited berganding bahu dan tenaga bagi memastikan program ini membuahkan kejayaan yang dihasratkan. Saya juga percaya dengan sentuhan YB Menteri yang turut turun padang hadir sebelum ini, warga Kanowit akan terus menerima limpahan kebaikan dan manfaat berterusan, insha Allah.
12. Setinggi-tinggi tahniah dan syabas kepada seluruh ahli jawatankuasa program yang terlibat secara langsung atau sebaliknya kerana berjaya menyumbang tenaga dan idea yang konstruktif dalam kelancaran penganjuran program kali ini.
13. Semoga kesungguhan usaha kolektif kita semua ini akan meningkatkan lagi semangat cintakan negara dan semangat jati diri dalam diri para pelajar khususnya dari aspek untuk memahami dan menerima kepelbagaian adat, budaya dan bahasa yang menjadi warisan berharga kepada kita semua sebagai rakyat Malaysia.
14. Sekian, terima kasih.